

王

會

篇

箋

釋

王會篇箋釋卷下

其西般吾白虎

孔氏曰次西也般吾北狄近西也王氏補注曰鄭志

張逸問詩傳白虎黑文答曰周史王會云

王氏自注下闕黑文

二詩釋文騶虞義獸也白虎黑文不食生物

王氏自注淮南

子注食自死之獸

有至信之德則至周書王會草木疏並同

又云尾長於身不履生草說文翹白虎也

王氏自注翹莫狄切

爾雅翹白虎

王氏自注翹胡甘切

瑞應圖白虎者仁而不殺王

者不暴虐恩及行葦則見

王氏自注漢宣帝時南郡獲白虎獻其皮骨爪牙秋

濤按此淮南子散宜生得白虎獻紂

本郭注

秋濤曰自此下至匈奴皆西北之國般吾疑卽昆吾
昆般古聲同部也地在今哈密境內大荒南經曰又
有白水山白水出焉而生白淵昆吾之所浴也郭注
昆吾古王者號音義曰昆吾山名海內經曰有昆吾
之邱郭曰此山出名金也尸子曰昆吾之金元和郡
縣志曰伊州禹貢九州之外古戎地稱昆吾周穆王
伐昆戎昆吾獻赤刀後轉爲伊吾周衰爲匈奴所得
漢武帝時驃騎將軍擊破匈奴右地始築令居以西
初置酒泉郡復分置武威張掖敦煌列四郡置兩關
焉兩關卽玉門陽關也王莽時地屬匈奴後漢明帝
永平十六年北征匈奴取伊吾廬地置宜禾都尉以

爲屯田兵鎮之所未爲郡縣後復爲匈奴所得自建
武至於孝和三通三絕至順帝時以伊吾舊膏腴之
地傍近西域匈奴資之以爲鈔暴開設屯田如故事
置伊吾司馬一人至魏立伊吾縣晉立伊吾都尉並
寄理敦煌北界非今之伊州後魏及周又有鄯善人
來居之大業三年得其地以爲伊吾郡隋末又爲羣
夷居焉貞觀四年內附於其地置伊州州境東西一
千一十五里南北四百九十里西南至西州七百三
十里東南取莫賀磧路至瓜州九百里正南微東至
沙州七百里領縣三伊吾柔遠納職又伊吾縣在伊州郭
下本漢伊吾屯貞觀四年置縣後漢書西域傳伊吾

地宜五穀桑麻葡萄其北又有柳中皆膏腴之地故漢常與匈奴爭之以制西域云云蓋昆吾之地唐爲伊州今爲哈密皆西方重鎮也邵氏晉涵曰漢儒以白虎擾爲思睿信立之應四子講德論又以爲偃武修文之應沈約宋書列於符瑞志然南齊屢見白虎不爲瑞也郝氏懿行曰嘗疑說文有彪無彪玉篇廣韻彪彪互見蓋篆文甘作目與日形近而誤衍也證以釋文彪字林下甘反又亾狄反亾狄卽彪字之音可知彪衍爲彪宜據以訂正又按浚儀補注引鄭志詩釋文淮南子意以此白虎卽騶虞也故云下闕黑文二字然參考諸書騶虞乃前央林酉耳非此也所

云尾長於身正見前說酉耳文內近閩縣陳編修壽祺亦以此白虎下闕黑文字非也

屠州黑豹

孔氏曰屠州狄之別名王氏補注曰晉史北狄有屠各山海經幽都山多玄虎玄豹散宜生得玄豹列女傳南山有玄豹霧雨七日而不下食欲以澤其毛而成文章也爾雅魑王氏自注式竹切黑虎注晉建平秭歸縣檻得之狀如小虎而黑毛深者爲斑

秋濤曰按屠州蓋卽休屠也匈奴傳有休屠王後地入於漢今甘肅涼州府一統志以爲卽休屠王地通典匈奴祭天處在雲陽甘泉山下秦擊奪其地後徙

之休屠王右地故休屠有祭天金人像按涼州府鎮番縣之東北有休屠澤休屠國卽取是澤以爲名漢書地理志武威縣休屠澤在東北古文以爲豬野澤書禹貢原隰底績至于豬野卽此水經注武威北有休屠澤俗謂之西海其東有豬野澤俗謂之東海通謂之都野括地志豬野澤在姑臧縣東北一百八十里元和郡縣志姑臧縣有白亭軍因白亭海爲名太平寰宇記姑臧縣白亭海水色潔白因以爲名又東有達狄迴海行都司志白亭海一名小闊端海子五澗谷水流入此海卽豬野澤也按此澤俗名魚海子卽今涼州府武威縣東之三岔河下流自鎮番東北

出邊又三百餘里豬爲澤方廣數十里去涼州殆五
百里括地志云一百八十里未合也按豬都屠魚俱
一聲之轉休與州聲又相近然則休屠之卽屠州可
參互而得矣又按海內經北海之內有山名曰幽都
之山黑水出焉其上有立鳥立蛇立豹立虎立狐蓬
尾有大立之山有立邱之民郭注曰言邱上人物盡
黑也又淮南子云堯北撫幽都高誘注曰陰氣所聚
故曰都今雁門以北是秋濤按此黑水以地理證之
當卽黑龍江也其水所出卽幽都山今謂之肯特山
莊子云流共工于幽都蓋卽其地屠州強盛之時必
兼有幽都之地故以立豹爲貢屠與都州與幽音亦

皆相近歲久而語音轉移也

禺氏駒駝

孔氏曰禺氏西北戎夷駒駝馬之屬王氏補注曰管子曰堯舜之王北用禺氏之玉注西北戎名又曰玉幣有七筴禺氏邊山之玉一筴也伊尹朝獻商書正北以駒駝爲獻山海經北海內有獸狀如馬名駒駝色青字林北狄良馬也一曰野馬瑞應圖云幽隱之獸也有明王在位卽至說文野馬之良也王氏自注史記匈奴奇臺到駒駝音同塗顏師古日出北海中其狀如馬非野馬也秋濤曰按禺氏在西北月氏亦在西北漢以後禺氏無聞而月氏詳於史禺月一聲之轉禺氏蓋卽月氏

息同出一封橐駝按大月氏本在敦煌祁連間後爲
匈奴所破西徙過大宛擊大夏而城之都媯水北爲
王庭此所紀大月氏之土壤物產皆大夏之土壤物
產故具錄焉瀛寰志略曰媯水卽阿母河源分十數
支皆在雪山之北蔥嶺之西匯流之後西北行約二
千餘里又北折行約千里而入于鹹海大月氏王庭
旣在媯水之北則其部曲自在媯水左右乃今布哈
爾境土也按志略又言布哈爾亦回部大國東接拔
達克山諸部北與浩罕接壤幅員恢闊東境多山嶺
西界有大戈壁也沙磧有城郭而兼游牧以今考之游
牧者月氏餘風城郭者大夏舊俗是其爲月氏大夏

王會篇箋釋 卷下

故壤灼然無疑雖數千年之後尚可溯其原委也

犬戎文馬而赤鬣縞身目若黃金名吉

本注一皇一本注作古

黃之乘

孔氏曰犬戎西戎之遠者也王氏補注曰山海經白

犬有牝牡是爲犬戎書傳文王伐犬夷匈奴傳西伯

伐畎夷

王氏自注即畎戎也

隴以西有畎戎山海經犬封國曰

犬戎國狀如犬有文馬縞身朱鬣目若黃金名曰吉

量

王氏自注或作良一作彊

乘之壽千歲注六韜曰文身朱鬣眼

若黃金項若雞尾名曰雞斯之乘書大傳散宜生之

犬戎氏取美馬駁身朱鬣雞目者取九六焉瑞應圖

騰黃神馬一名吉光說文馬赤鬣縞身目若黃金名

曰馮吉皇之乘周文王時犬戎獻之

秋濤曰按犬戎在周爲肘腋之患以地勢最近豐鎬

故也孔氏以爲遠戎

蓋因山海經有犬戎國狀如犬及人面獸身之說故疑之爾不

知古書簡略所云狀如犬云者不過謂其雖肝似獸非眞四足而毛也

非是顧氏棟高

云犬戎西戎之別在中國者在今陝西鳳翔府境其

本國則今西甯府西北樹敦城是也史記匈奴傳周

西伯昌伐畎夷氏索隱曰韋昭云春秋以爲犬戎按

畎音犬太顏云卽昆夷也山海經云黃帝生苗龍苗

龍生融吾融吾生弄明弄明生白犬白犬有牝牡是

爲犬戎又山海經有人面獸身名曰犬夷賈逵曰犬

夷戎之別種也史記又曰周道衰而穆王伐犬戎得

四白狼四白鹿以歸自是之後荒服不至周幽王用寵姬褒姒之故與申侯有卻申侯怒而與犬戎共攻殺周幽王于驪山之下又曰秦穆公得由余西戎八國服于秦故自隴以西有緄戎正義曰音昆字當作混顏師古云混犬夷也是名異實同皆卽王會之犬戎也又按吉黃之馬文王時散宜生購諸犬戎以獻紂至成王時犬戎又以爲貢是當時彼地產此神駿不足爲異又案吉黃盧學士刻本作古黃校云古黃說文作吉皇海內北經注引作吉黃此從舊本作古黃與初學記所引亦合王懷祖先生讀書雜誌曰作吉黃者是也王本作吉黃與說文山海經注合山海

經圖讚亦作吉黃文選東京賦注引瑞應圖云騰黃
神馬一名吉光黃古同聲吉光卽吉黃也海內北
經作吉量下字雖不同而上字亦作吉則作吉黃者
是也藝文類聚祥瑞部下初學記獸部引此並作古
黃乃類書相沿之誤不可從也又案海外西經奇肱
之國其人一臂三日有陰有陽乘文馬郭注文馬卽
吉良也則不獨犬戎有是馬矣畢尙書曰爾雅回毛
在背闕廣疑闕廣吉量音相近此亦昔人所未論及
者又按方以智通雅曰飛黃訾黃翠黃乘黃吉量古
皇吉光吉黃一物也按漢書郊祀志訾黃封禪書翠
黃注皆以爲乘黃淮南子飛黃服阜注乘飛黃者壽

三千歲亦似指乘黃而言惟白民之乘黃與犬戎之
吉黃並載王會形狀迥殊歷攷載籍無指爲一物者
密之概合爲一未敢以爲然也

數楚每牛每牛者牛之小者也

孔氏曰數楚亦北戎也王氏補注曰爾雅注犏牛庫
小今之犏牛也又呼果下牛

秋濤曰按數楚蓋西戎非北戎也西山經數厯之山
楚水出焉而南流注于渭關駟以是水爲汧水焉畢尙書曰
厯山南流注于渭關駟以是水爲汧水焉畢尙書曰
金史地理志鳳翔路號有楚山數厯與楚聲相近故
水亦曰楚水也山當在今陝西隴州疑俗稱西泰山

在州東南百里者是也楚水今出隴州西南東流逕西泰山南又東至寶雞縣西入于渭俗亦稱陸川秋濤按據此則數厯山楚水蓋卽數楚故壤矣又按西山經黃山有獸焉其狀如牛而蒼黑大目其名曰犖郭注音敏畢注曰犖非古字當爲每廣韻犖音切同美是也引王會篇每牛爲證秋濤按每犖一聲之轉此篇云牛之小者山經所云亦牛之蒼黑者耳蓋卽一物也郭注云今始平槐里縣有黃山上故有宮漢惠帝所起疑非此畢注曰山未詳也或說卽今陝西興平黃山斯錯簡耳秋濤按每牛旣在黃山數厯山又在黃山附近之地則黃山在興平無疑數厯之卽

爲數楚亦無疑王會列數楚與犬戎相次犬戎在西

則數楚亦在西是皆炳然可據者以數千年不知所

在之處一旦豁然誠快事也又按爾雅犝牛釋文犝音碑

郭注犝牛庫小今之犝釋文子息反牛也又呼果下

牛出廣州高涼郡邵氏晉涵曰犝牛卽每牛也王會

云每牛者牛之小者也犝每聲之轉

匈奴狡犬狡犬者巨身四足果皆北嚮四足一作四尺

當作皆南嚮以下文南方諸國皆北嚮推之可知若均北嚮則此句不必複出矣

孔氏曰匈奴一有域北戎也王氏補注曰伊尹朝獻

商書正北匈奴晉灼曰堯時曰葷粥周曰獫狁秦曰

匈奴通典云山海經已有匈奴爾雅疏五狄三曰匈

奴說文狡少狗也匈奴有狡犬巨口而黑身

秋濤曰按葷粥獫狁匈奴三名並一聲之轉事迹詳見各史列傳海內南經匈奴開題之國列人之國並在西北郭注匈奴一曰獫狁畢尙書曰穆天子傳有曹奴疑亦此曹奴音相近史記匈奴傳曰其先祖夏后氏之苗裔也曰淳維索隱云張晏曰淳維以殷時奔北邊又樂彥括地譜云夏桀無道湯放之鳴條三年而死其子獫粥避居北野隨畜移徙中國謂之匈奴其言夏后苗裔或當然也今按伊尹四方令匈奴在商初早爲建國又山海經已有匈奴則夏以前匈奴久著于北方矣似晉灼所言較爲近是或古有匈

奴部落洎維奔其國因爲君長若箕子之於朝鮮未
可知也孟子云太王事獯鬻又云昔者太王居邠狄
人侵之事之以皮幣云云趙注交鄰章云獯鬻北狄
强者今匈奴也太王去邠避獯鬻是獯鬻卽狄也吳
越春秋太伯傳云古公爲狄人所慕薰鬻戎姁而伐
之據其所言似狄與獯鬻爲二種周氏廣業曰吳越
春秋後漢趙氏所撰蓋刺取史記說苑諸書爲之其
書視諸說最後而獯鬻姁狄之說前此無之未足爲
據也又按西山經玉山西王母所居有獸狀如犬而
豹文其角如牛其名曰狡其音如吠犬見則其國大
穰按王會所稱狡犬形狀略同疑卽一物其角如牛

似當作其大如牛卽巨身之謂也梁曜北曰四足果
蓋足短之稱若果下牛果下馬矣王懷祖先生讀書
雜志曰案古無謂短爲果者果下馬謂馬高三尺乘
之可於果樹下行耳見魏志東夷傳注非謂短爲果也而以
四足果爲四足短可乎予謂果疑卽裸字周官龜人
東龜曰果屬釋文果魯火反魯火正切裸字是果與
裸同音袒裼裸程之裸亦通作果范望注太玄玄數
曰裸謂無鱗甲毛羽然則四足果者四足無毛之謂
歟

權扶玉目

秋濤按一本作三日誤

孔氏曰權扶南蠻也玉之有光明者形小也一本奪此注但

存形甚小三字王氏補注曰周禮注相玉書曰珽玉六寸明
自照

秋濤曰孔氏不言權扶所在今按權扶蓋山名在今
漳州府海澄縣北與泉州府同安縣接界世謂之文
圃山權與文扶與圃均一聲之轉也其山四面圓秀
一名十八面山權扶國蓋以山爲名玉目卽今之所
謂水晶漳郡所產故以爲貢方以智通雅曰水晶閩
中極多有五色一統志云漳州之梁山大帽山俱出
水晶有地名水晶坪按水晶本名水精取其瑩澈晶
光猶人之目中瞳人謂之目精也其質乃玉類又有
黑白二色故有玉目之名山海經謂之水玉廣雅謂

之石英格古要論云水晶性堅而脆刀刮不動色白如冰清明而瑩無纖毫瑕玷擊痕者爲佳按古人或謂千年冰化爲水晶然水晶自是石中所產非關冰化也又按海南諸國有扶南自吳晉時始著或疑卽權扶今按通典云扶南國在日南郡之南海西大島中去日南可七千里在林邑西南三千餘里國俗本裸不制衣裳云云是扶南卽白民裸國之類在西南海中王會此文連舉禽人路人長沙各國皆近在楚越東南方忽及扶南則非其次且古蠻王本有以扶爲氏者

一統志湖南長沙府安化縣東七十里飛霜崖絕壁上有扶氏墓相傳蠻王扶氏葬此

又唐費州

在今貴州思南府安化縣東南一百里

扶陽縣有扶水然則

扶南蓋以在扶之南爲名非卽權扶也至長沙僅有扶氏不聞其地有扶名殆蠻之後裔流徙所居不足爲異思南雖有扶水而地不產玉惟漳郡地名旣諧而所出水玉又與王會相合方域物產確有可據不得移而他屬矣又按通雅云似珠而大者曰玉目引王會注玉目寶玉似大珠者也按諸本孔注與方氏所引不同疑密之所見別一本也然玉似大珠則光明洞徹亦非水晶不足以當之

白州比閩比閩者其華若羽伐其木以爲車終行不敗

比閩一作北閩秋濤按華當作葉說見後

孔氏曰白州東南蠻與白民接也水中可居曰洲洲

中出此珍木水中可居以下一本奪去王氏補注曰爾雅疏戎類有老白廣志櫻一名并閭葉似車輪比閭疑亦并閭之類

秋濤曰按白州孔氏以爲東南蠻不言所在今按福

建延平府有柃欄山柃閭極多疑其地卽白州也統一

志柃欄山在延平府永安縣北二十里生雲吐霧隱見無時草木蒙茸冬夏一色多產柃欄木故名九域志南劍州有柃欄山上有徑曰走攻延平府南平縣馬埕峯之高者爲天柱射垛諸峯

有仙洲介于二水之間少南又有黃龍洲又蒙洲在縣東北五十里又沙縣治東對岸有山洲一名崇安洲溪旁三面皆阻水唐時崇安鎮置于此又有大洲在沙縣治西南溪中亦名長洲一名蚪洲以形若潛

虬出水也舊長數百丈溪水至此中分有居民千餘家後洲漸落猶長二三十丈土人謂之金沙墩溪之上流多險巇至此則稍平緩又將樂縣有白水潚在縣南六十里一水自高崖而下可百餘丈望之如白虹合而論之延平在諸水之間本有洲名其水又有白水之名故古謂之白州比閭卽并閭比并一聲之轉西山經石脆之山本草引作石翠之山其木多櫻栴郭璞注櫻樹高三丈許無枝條葉大而員枝生梢頭實皮相裹上行一皮者爲一節可以爲繩一名栴欄文選西京賦注引郭注作并閭說文云櫻栴欄也可作萆萆雨衣也按此木今所在園林中有之鄉人剝取櫻皮

以覆屋雨水漸漬不爲損壞故可以作雨衣本草拾遺云其皮作繩入水千年不爛皆與王會所紀爲車終行不敗之說合又宋嘉祐本草云椶櫚木高一二丈無枝條葉大而圓有如車輪萃于樹杪此卽王會所云其葉若羽言如鳥羽之在樹杪也今本葉作華傳寫之誤耳又按酉陽雜俎云白州比閩華其華若羽伐其木爲薪終日火不敗按段柯古此說他無所經見蓋誤記王會之詞也

禽人管

秋濤按太平御覽九百九十六卷引此作會人獻以管注云會或作禽

孔氏曰亦東南蠻管草堅忍

秋濤按太平御覽引作堅刃刃卽新字

王

氏補注曰爾雅白華野管注茅屬陸璣疏管似茅其

根下有白粉柔韌宜爲索

秋濤曰禽人不知所在按今湖南寶慶府新甯縣爲漢零陵郡地新甯舊治在今縣東二里金城村金禽聲相近疑卽古禽人國也菅蓋卽異物志之香菅吳錄謂之香茅者也實零陵所產故禽人以爲貢焉異物志曰香菅似茅而葉長大於茅不生洿下之地邱陵山岡凡所蒸享必得此菅苞裹助調五味益其芬菲吳錄地理志曰零陵泉陵有香茅古貢之縮酒按書禹貢荊州厥貢包匭菁茅傳曰茅以縮酒孔疏曰郊特牲云縮酒用茅明酌也特令此州貢茅茅當異於他處左傳齊謂楚曰爾貢苞茅不入王祭不供無

以縮酒寡人是徵盛弘之荊州記曰零陵郡有香茅
桓公所以責楚胡朏明曰按水經注云晉書地道志
曰泉陵縣有香茅氣甚芳香言貢之以縮酒蓋此茅
潔且芳異於他處所產宜縮祭祀之酒故特令包匭
而貢之又曰案菁茅菁菁然華盛而氣更芬芳貢之
者欲其色香不變故包而加之以匭包在內匭在外
也一統志永州府土產香茅卽此茅氏匯疏曰蠻溪
叢笑云麻陽包茅山茅生三脊又云今辰常並出靖
州亦多有之胡氏曰湖南產茅處雖多終當以泉陵
之香茅爲正泉陵今永州府治零陵縣及所領祁陽
縣皆其地也合觀諸說則禽人之菅自三代以來重

之矣又按縮酒之說有二解周禮甸師祭祀其蕭茅鄭司農云蕭字或爲茜茜讀爲縮束茅立之祭前沃酒其上酒滲下去若神飲之故謂之縮杜注左傳用其說魏華父云古無灌茅之義所謂縮酒只是醴有糟故縮於茅以清之若曰滲下去如神飲此臆說也胡氏曰案周禮司尊彝曰醴齊縮酌注云以茅縮去滓也解縮字甚明仍不用先鄭祭前沃酒之說

路人大竹

孔氏曰路人東南

一作東方

蠻貢大竹王氏補注曰鄭語

北有路洛泉徐蒲注皆赤翟隗姓春秋赤狄潞氏

王氏

自注今潞州潞城縣

山海經長石山之西有共谷其中多竹衛

邱之山竹林在焉大可爲舟岳山尋竹生焉

王氏自注大竹

也
秋濤曰自權扶以下俱南方之國孔氏云路人東南

蠻是也浚儀引北方赤翟之路證之非矣

方氏亦云注路爲赤

狄恐在北方按元和姓纂云露氏露伯夏殷侯國也

無此大竹也
子孫以國爲氏焉露氏譜越王句踐七代孫閩君搖

漢封東甌王搖別封其子爲露余侯因氏焉二說不

同今按路露駱古字並通夏殷露伯卽周初路人蓋

越之支而封於閩地者也路人在東南閩地亦在東

南攷其方域正爲密合史言閩越東甌姓駱氏後子

孫又姓露氏皆原於此露氏譜不能言其初故第及

露余侯耳今福建汀州府武平縣東北有露溪一溪
七灣俗呼露溪七渡引流而東亦曰大順嶺溪又北
入長汀縣界下流入汀水至廣東潮州府入海汀潮
皆古閩越露溪當卽故路人國地也又按史記東越
傳云閩越王無諸及越東海王搖者其先皆越王句
踐之後也姓騶氏徐廣曰騶一作駱索隱曰徐廣說
是上云甌駱此別云閩不姓騶也世皆疑句踐之後
何以不姓姒而姓駱昔人亦無言其故者今按姒爲
夏后之姓駱則以國爲氏猶齊陳氏之後不姓嬌而
姓田楚國之後不姓芊而姓昭屈景古人類多如此
不足爲異統前後而論之蓋在夏殷爲露伯國在周

初爲路人國及周末地入於越句踐封其支庶於此
秦取其地爲閩中郡越之子孫失國因以國爲氏而
姓駱及漢興復封閩越東甌二國無諸與搖皆駱氏
而搖之子又別爲露氏蓋其源委如此此皆東南之
地在南越之東者也若南越之西別有西甌駱疑其
亦駱氏別種分王於彼者而壤土處蒼梧之西南與
王會之路人不可溷爲一地矣史記南越傳載趙佗
上書言南方卑溼蠻
夷中閩其東閩越千人眾號稱王其西甌駱裸國亦
稱王是閩越在東駱越在西確有明證漢滅南越時
越桂林監居翁論甌駱屬漢皆得爲侯蓋甌駱在廣
西與桂林近故得而論之通典云貴州古西甌駱越
之地唐貴州在今廣西潯州府貴縣南卽其地也又
南越傳云閩越西甌駱役屬焉漢書音義曰駱越也
索隱曰姚氏案廣州記云交阯有駱田仰湖水上下
人食其田名爲駱侯諸縣自名爲駱將銅印青綬卽

今之令後蜀王子將兵討駱侯自稱為安陽王治封
溪縣後南越王佗攻破安陽王令二使與主交趾九
真二郡即臨駱也是交趾九真亦為駱越其地益在
西南矣總之東臨閩越本姓駱氏與西臨駱越實同
一種類而建國之地則相距數千里實東號西號舊
鄭新鄭不可不詳為區別王會之路人實在東不在
西也若交州記言駱越因駱田以命名不知駱之云
有國已肇始于夏殷之時駱田之名猶為後起矣云
大竹者其竹之大異於常竹也一統志載汀郡土產
如竹鎖竹絲器及紙之類皆竹所為故成王時以大
竹充貢方以智通雅云員邱即路人竹按方氏所云
路人竹直指大竹言非真員邱竹一名路人竹也考
載籍言大竹不一神異經之太極竹長百餘丈南涕
竹南方荒中有皆荒渺無稽華陽國志漢竹出哀牢
長數百丈相去南方草木狀之由梧竹出交趾長雲母竹為一節
一丈

山扶南山海經之衛邱山竹經云衛邱山南帝俊竹林在焉大可爲舟注俊音舜

舜則可爲舟大抵出自遐荒距路人地遙遠惟異物

志云篲簞竹生水邊長數丈圍一尺五六寸一節相

去六七尺或去一丈廬陵界有之今江西吉安府又異苑云

建安有篲簞竹今福建建甯府又南越志云羅浮山第三十

一嶺半是巨竹皆七八圍長一二丈有三十九節葉

若芭蕉謂之龍鍾竹常有鸞鳳棲宿其上羅浮山在今廣東惠

州此三處大竹與路人相近任土作貢有由然矣

長沙鼈

孔氏曰特大而美故貢也王氏補注曰湘川記秦分

黔中以南長沙鄉爲長沙郡

秋濤曰按通典云長沙郡潭州古三苗國之地自春秋以來爲黔中地楚國之南境秦爲長沙郡有萬里沙祠故曰長沙漢爲長沙國後漢復爲長沙郡晉因之宋長沙國兼置湘州齊因之又爲長沙郡湘川之奧人豐土關南通嶺嶠脣齒荆雍亦爲重鎮一統志云隋平陳廢郡改州曰潭州大業初復改爲長沙郡唐曰潭州曰長沙郡宋仍曰潭州長沙郡元天歷二年升爲天臨路明初改潭州府洪武五年又改長沙府 國朝因之今按王會所紀則成周之初長沙自爲一國厥後乃地入于楚通典於三苗國後未及此蓋偶未檢周書也撫言云沅江鼈甲九肋者稀沅江

下流入洞庭與長沙相近蓋其鼈之種類有異故以爲獻矣 秋濤又按自權扶以下九國皆南方之國而權扶至長沙五國列于東蓋南方臺正東也明其爲東南之國也魚復至南人四國次于其西蓋南方臺正西也明其爲西南之國也長沙禽人在嶺之北而附于東南蠻揚南人在嶺之南而附于西南此或因其風俗部落之相似而次之亦猶東胡與匈奴接壤而一附東北一附西北不相溷也王會之穀列以序不相雜廁也如此

其西魚復鼓鐘鐘牛

孔氏曰次西列也

一本奪此注

魚復南蠻國貢鼓及鐘而

似牛形者美遠致也王氏補注曰左傳魚人注魚復

王氏自注音腹

今巴東永安縣

王氏自注今夔州奉節縣

十道志夔州春

秋時魚國漢爲巴郡魚復縣鐘牛未詳

秋濤曰按左傳文十六年庸人率羣蠻叛楚楚人伐

庸七遇皆北唯裨儵魚人實逐之杜注魚庸邑卽魚

復據王會則周初魚復本自爲國春秋時地始屬庸

也一統志魚復故城在今四川夔州府奉節縣東北

漢置魚復縣其後移治白帝城而此城廢舊唐書地

理志曰漢魚復縣今奉節縣北三里赤甲城是也水

經注曰赤岬城公孫述所造因山據勢周迴七里一

百四十步東高二百丈西北高一千丈南基連白帝

山按漢昭烈帝章武二年改魚復曰永安晉太康元年復曰魚復宋齊梁因之西魏改曰人復唐貞觀二十三年改曰奉節今縣卽因其名也

蠻揚之翟

孔氏曰揚州之蠻貢翟鳥王氏補注曰禹貢揚州有島夷翟雉名徐州羽畎夏翟左傳注南方曰翟雉爾雅鶴山雉注長尾者疏云今俗呼山雞王叔之翟雉賦雉見質而不陋翟表文而不華

秋濤曰按此蠻揚與蒼梧相次地當相近以其地屬揚州而國名蠻揚猶徐州之境有徐夷之國荊州之境有荊楚之國皆以州名國亦其例也史記秦并天

下略定揚越張晏曰揚州之南越也索隱曰案戰國策云吳起爲楚收揚越正義曰夏禹九州本屬揚州故云揚越案史所云揚越乃百越之總名今廣東廣西及交趾占城之地皆是揚越本一聲之轉故交廣爲越地卽爲揚地漢魏諸儒皆以交廣屬揚州據此也然揚越指全粵而言其地廣王會之蠻揚則指一國而言其地隘攷史記南越傳載趙佗移檄告橫浦陽山湟谿關姚氏注云地理志桂陽有陽山縣今此縣上流百餘里有騎田嶺當是陽山關按此是秦已有陽山蓋沿周時舊名蠻揚疑卽陽山也西漢亦以陽山爲侯國在今廣東連州陽山縣東卽其地矣或

曰成王時越裳貢白雉見于典籍不一而足而王會
不載以音類求之疑蠻揚卽越裳也蓋越裳在交阯
西南故謂之蠻越揚越聲轉字通故亦書爲蠻揚翟
卽白雉也按此說恐未確姑存以備攷王懷祖先生
讀書雜志以揚當作楊从木不从手當從之按索隱
作楊尙存古字雜志又曰蠻楊本作楊蠻故孔注曰楊州之
蠻貢翟鳥今本楊蠻二字倒轉則義不可通且與注
不合上文之良夷山戎若倒言之則曰夷良戎山其
可乎楊蠻之誤爲蠻楊猶詩荆蠻之誤爲蠻荆段氏
詩經小學已辨之今按王先生說非是此蠻揚猶言
蠻越是國名非州名猶於越及于越東越皆當以越

字在下也與夏夷山戎命名之義本殊合而論之是望文生義未爲得矣

倉吾翡翠翡翠者所以取羽

孔氏曰倉吾亦蠻也翠羽其色

一本無此字

青而有黃也

王氏補注曰山海經南方蒼梧之邱禮記注蒼梧於周南越之地楚吳起南并蠻越遂有蒼梧漢有蒼梧

王趙光後平南粵以其地爲蒼梧郡

王氏自注今梧封賀昭藤龔州

靜江德慶肇慶府之地

爾雅翠鵠注似燕紺色生鬱林伊尹朝

獻商書正南翠羽異物志曰翠鳥似鶯翡翠赤而翠青其羽可以爲飾交州記翡翠出九真頭黑腹下赤青縹色似鷓鴣

秋濤曰倉與蒼吾與梧古字通用今梧州卽宋梧州桂林

宋靜江府平樂宋昭平府肇慶宋德慶府四府及德慶宋德慶府封川宋封川

賀宋賀州藤宋藤州平南宋平南等州縣皆漢蒼梧郡地其

地古多梧樹嶺南異物志曰南人以梧爲蒼梧故以

名郡是也禮檀弓舜葬于蒼梧之野海內南經曰蒼

梧之山帝舜葬于陽帝丹朱葬于陰海內經南方蒼

梧之邱蒼梧之淵其中有九疑山舜之所葬在長沙

零陵界中郭注曰山在今零陵營道縣南疑古者總

名其地爲蒼梧也按此是古時蒼梧地廣今湖南永

州府界亦其地也史記載舜南巡狩崩于蒼梧之野

說與檀弓山海經合與孟子異蒼梧在周初爲荒服

國戰國時屬楚蘇秦說楚威王南有洞庭蒼梧卽此
漢以蒼梧郡爲交阯刺史治所明代兩廣總督亦多
駐梧州蓋地爲百粵襟喉故重其權以資控制也王
逸注楚詞招魂云雄曰翡雌曰翠李善注鶴鵠賦引
異物志曰翡赤色大於翠劉逵注蜀都賦云翡翠常
以二月九月羣翔又注吳都賦云翡翠巢於樹巔生
子夷人稍徙下其巢子大未飛便取之皆出于交阯
鬱林南禹貢揚州貢齒革羽毛傳曰羽鳥羽正義曰
翡翠孔雀之屬漢趙佗獻帝亦以翠鳥生翠蓋炎州
珍異自古尙之矣

南人致眾者皆北嚮

秋濤按此節原在其餘皆可自
古之政下今移于此致一作至眾

當作象
說見後

孔氏曰南人南越王氏補注曰歷代史皆云五嶺之南至于海並禹貢揚州之地故云揚粵朱子曰山海經記諸異物飛走之類多云東向或云東首皆爲一定不易之形疑本依圖畫而爲之古人有圖畫之學如九歌天問皆其類愚謂此篇亦然秋濤按此篇與同所記東夷西嚮西戎東嚮北狄南嚮南蠻北嚮皆與明堂位合是記當時朝位非出于圖畫也浚儀之論似是而非鄭康成注禮許叔重說文皆稽以爲證故附辨于此蓋周書著錄于劉略班志非晉時始出繫之汲冢失其本矣閱覽洽聞之士如郭景純王元長援述者不一宜與禹貢職方並傳敘事之祖也若禹四海異物

載於大傳湯四方獻令附於王會合而觀之三代之典粲然矣

秋濤曰南人致眾義無所取眾當作象字形相近故譌此言南越之國以象爲貢也南越地最廣遠其都會則今廣東廣州府番禺縣是說文象長鼻牙南越大獸三年一乳南州異物志曰象之爲獸形體特詭身倍數牛目不逾豕鼻爲口役望頭若尾馴良承教聽言則跪素牙玉潔載籍所美服重致遠行如邱徙嶺表錄異曰廣之屬郡潮州今潮州府循州今嘉州府多野象牙小而紅宋莘視聽鈔曰鄭文振潮陽人言象爲南方之患土人苦之不問蔬穀守之稍不至踐食之立盡

性嗜酒聞酒香輒破屋壁入飲之人皆於其來處架
高木若望火樓然常有人直象獨畏煙火先用長竿
接茅把於其杪望見其來其然火把持竿以指之卽
去隨之三四里方敢回羣行者猶庶幾其獨行者最
喜傷人蓋勢孤恐人害之也土人以巨木設機壓之
自潮陽來必經由夔江嶺此處最多先使人行前探
之或遇其大羣有候數日不去不敢行者監司巡歷
則保甲鳴鑼鼓趕逐之頑然若無聞也必俟其自散
去乃敢過按廣潮等處宋時尚多象爲害如是今則
絕少此物蓋戶口益眾則山箐闢而異類遠去也
秋濤又按此節本在其餘皆可知自古之政下今按

王會於四方之國各敘其貢物朝位此文南人致象
與上魚復蠻揚倉吾相接並南方之國也故云皆北
嚮今本誤次于後則文義不相連貫蓋錯簡也今移
正

其餘皆可知自古之政秋濤按此節本在倉吾翡翠節之下南人致象節之上今考正此移

孔氏曰餘謂眾諸侯貢物也言政化之所致也王氏
補注曰書旅獒曰明王慎德四夷咸賓無有遠邇畢
獻方物惟服食器用而此篇諸方致貢無所不有益
遠人來慕以其寶摯而不寶遠物以庶邦惟正之供
乃成王之心也

王氏自注明堂位九夷八蠻六戎五狄職方氏四夷八蠻七閩九貉五戎

六狄鄭注云周之所服國數也

秋濤曰按王會止記要荒諸國所貢之物而於侯甸采衛所貢皆未及焉故舉其大凡言眾諸侯貢物皆不異於古也按禹貢荊州貢菁茅而周亦貢苞茅於楚以此推之是九州方物任土作貢周因于殷殷因于夏無所更革故云可知自古之政也

禹四海異物秋濤按此後儀王氏標題今因之

夏成五服外薄四海

鄭氏玄注曰言德

一本作都

廣之所及王氏補注曰五服

甸侯綏要荒薄迫也九州之外迫於四海

秋濤曰堯典云光被四表鄭注曰言堯德光耀及四

海之外益稷云外薄四海咸建五長禹貢云東漸于海西被于流沙朔南暨聲教訖于四海此言唐虞夏所服四海也商頌玄鳥云肇域彼四海四海來假鄭箋假至也天下既蒙王之政令皆得其所而來朝觀貢獻此言商所服四海也蓼蕭詩序云澤及四海也孔疏謂時王恩澤被及四海之國使四海無侵伐之憂得風雨之節立政云至于海表罔有不服孔疏云四海之表無有不服王之化者此言周所服四海也

以上參用邵氏晉涵之說

爾雅云九夷八狄七戎六蠻謂之四海

顧氏炎武曰禹貢之言海有二東漸于海實言之海也聲教訖于四海槩言之海也秋濤按九州之外謂

之四海此通義也禹時東南二海皆在版圖之內其西北二海雖九州之外而聲教洋溢凡有血氣莫不尊親故云外薄四海

東海魚須魚目

鄭氏曰所貢物魚須今以爲簪又魚目今以雜珠王氏補注曰子虛賦靡魚須之橈旃注大魚之須出東海見尚書大傳雒書曰秦失金鏡魚目入珠

秋濤曰禹貢海岱惟青州海岱及淮惟徐州淮海惟揚州凡三州言海青徐海在東揚州則海在東及南又冀兗之東北亦濱東海而禹貢未言以他州推之可知也禮記笏大夫以魚須文竹鄭注曰文猶飾也

大夫士飾竹以爲笏釋文曰崔云用文竹及魚班也
隱義曰以魚須飾文竹之邊須音班正義曰庾氏云
以鮫魚須飾竹以成文盧云以魚須及文竹爲笏非
鄭義也王懷祖先生曰須與班聲不相近此節經文
及釋文正義內須字皆頒字之誤頒與班古字通故
釋文音班崔氏曰用文竹及魚班也說文鮫海魚也
皮可飾刀郭璞注中山經曰鮫魚皮有珠文而堅可
飾刀劍口然則鮫魚皮有班可以爲飾故大夫用之
以飾笏也若魚須非所以飾笏且不聞有文彩不得
言以魚須文竹矣自唐石經始誤頒爲須而集韻二
十七刪內遂收入須字音逋還切引禮記大夫以魚

須文竹而類篇以下諸書並沿其誤矣應鑄吳澄陳
澔須字皆如字讀謂大夫以魚須飾竹皆由不知頌
之誤爲須故不得其解而妄爲之辭秋濤按禮記之
魚須羣經音辨云音班用崔氏庾氏及隱義之說云
又如字則用盧氏之說蓋崔庾以須爲班則魚須卽
大傳南海之魚革也盧分魚須與文竹爲二則魚須
卽大傳東海之魚須也二說不同未可執一旦魚須
旣可以飾旃栢張揖注子虛賦曰以魚須爲旃栢何不可以飾笏旣
以爲飾則必有文采矣鄭注禮記未嘗破須爲頌則
仍是言以魚須飾竹與應吳諸家說合必謂元本作
頌而強鄭以從崔庾未敢以爲然也魏武四時食制

云東海有大魚如山長五六里謂之鯨鯢次有如屋者時死海上膏流九頃其鬚長二丈廣三尺厚六寸瞳子如三升椀唐書開元七年大拂涅靺鞨獻鯨鯢睛述異記曰南海有明珠卽鯨魚目瞳可以鑒俗謂之夜光博物要覽云日本國產如意寶珠青色大如雞卵光彩四射云是鯨魚目睛

南海魚革珠璣大貝

鄭氏曰魚革今以飾小車纏兵室之口貝古以爲貨王莽時亦然王氏補注曰璣珠不圓也禹貢荊州厥篚璣大傳曰散宜生得大貝如車渠爾雅大貝曰蚌說文鮐大貝也

王氏自注音岡詩象弭魚服注魚服魚皮也

草木疏魚獸似豬東海有之其皮背上班文腹下純青爲弓鞭矢服海潮及天將雨其毛皆起

秋濤曰左傳楚子曰寡人處南海時楚地未至南海特侈言之爾詩言至于南海呂氏以爲極其遠而言之按王會載南人致象注以爲南越則周成王時南海之國固已服屬矣禹貢導黑水入于南海此則實指南海而言大禹固親歷其地也南海後世謂之漲海秦置南海郡治番禺蓋自揭揚以西南至象郡皆南海也通典曰海南諸國漢時通焉大抵在交州南及西南居大海中洲上相去或五三百里五三千里遠者二三萬里乘船舉帆道里不可詳知外國諸書

雖言里數又非盡實也其西與諸胡國接元鼎中遣
伏波將軍路博德開百越置日南郡其徼外諸國自
武帝以來皆獻見後漢桓帝時大秦天竺皆由此道
貢獻及吳孫權遣宣化從事朱應中郎康泰使諸國
其所經及傳聞則有百數十國因立記傳晉代通中
國者蓋尠及宋齊至者有十餘國自梁武隋煬諸國
使至踰于前代大唐貞觀以後又多于梁隋焉又按
魚服之魚多解爲獸今按魏志東夷傳濊國海出班
魚皮卽說文所云魴魚出葦邪頭國者也魴班聲相
近故班魚謂之魴魚又說文山海經注並云魴魚可
飾刀鮫一名沙魚一名文魚是皆魚革之可用者則

詩所云魚服未可以魚獸概之也禮玉藻魚須一本
作魚頰注家釋爲魚班卽此魚革也說已見前交州
記曰鮫魚出合浦背上有甲珠文堅彊可以飾刀口
又可以鑣物按交阯合浦正南海地也又按書顧命
大貝鼉鼓在西房鄭氏注亦引書傳散宜生之江灌
之浦取大貝如車渠爲證車渠車輞也鄭注大傳郭
注爾雅並同
按古云大貝如車渠而後世遂以車渠爲大貝之名
博物要覽云車渠海中大貝也背上壘文如車輪之
渠故名又云大者長二三尺闊尺許厚二三寸殼外
溝壟如蚌殼而深大皆縱文如瓦溝無橫紋也殼內
白皙如玉亦不甚貴番人以飾器物謬言爲玉石之

類

西海魚骨魚幹魚脅

鄭氏曰魚幹魚脅未聞

秋濤曰漢書西域傳罽賓西南與烏弋山離接烏弋山離西與犁軒條支接行可百餘日乃至條支國臨西海渡海乃通大秦卽犁軒也後漢書言甘英抵條支而歷安息臨西海以望大秦距玉門陽關四萬餘里西海之遠如此按西海自西域傳始知其地自明神宗時大西洋利瑪竇等入中國始盛傳其方域國土一統志曰瑪竇有萬國全圖其大略言天下有五
大州第一曰亞細亞州第二曰歐邏巴州第三曰利

未亞州第四曰亞墨利加州最後得墨瓦蠟泥加州
爲第五而域中大地盡矣其所謂亞細亞州者自中
國以至日本交阯西域等國皆是也其所謂歐羅巴
州者則南至地中海北至青地及冰海東至大乃河
墨河的湖大海西至大西洋共七十餘國卽瑪竇等
所生之本國也其所謂利未亞州者南至大浪山北
至地中海東至西紅海聖老楞佐島西至阿則亞諾
海大小共百餘國其所謂亞墨利加州者地分南北
中有一峽相連峽南曰南亞墨利加南起墨瓦蠟泥
海峽北至加納達峽北曰北亞墨利加南起加納達
北至冰海東盡福島地最廣大其所謂墨瓦蠟泥加

者因以西把尼亞國王念地爲圓體徂西自可達東
乃命其臣墨瓦蘭者往訪沿亞墨利加東偏展轉經
年忽得海峽互千餘里海南大地杳無涯際以墨瓦
蘭首開此區遂卽其名命曰墨瓦蠟泥加云按西人
論地理者遞相祖述近儒加以考訂各成卷帙今錄
此以見其概云魚骨魚幹魚脅者按北史載一魚骨
有孔中通馬騎出入劇談錄云李德裕有巨魚脅骨
一條長二丈五尺其上刻云會昌二年海州送到太
平寰宇記云有人於林邑海嶼上得鯨頭骨大如數
百斛困事林廣記云大食勿拔國每歲常有大魚死
飄近岸身長十餘丈高二丈餘國人不食但剉其膏

爲油肋骨作屋桁脊骨作門扇骨節可爲曰海槎餘
錄云秋晚巡行昌化屬邑俄海洋煙水騰沸二大魚
約長數丈餘土人曰此番車魚也今中州藥肆懸大
魚骨如杵曰者乃其脊骨也五雜俎云海洋一巨魚
肉中刺骨亦長丈餘按諸書但言魚骨魚脇不言魚
幹攷爾雅釋畜在幹第方郭璞注幹脇也公羊傳莊
元年注亦云幹脇也儀禮少牢篇注以幹爲正脇特
牲篇注以幹爲長脇然則魚幹卽魚之正脅或長脇
耳蓋三者皆可爲器用故致之也

北海魚劍魚石出瑱擊閭

鄭氏曰魚劍魚兵如劍也魚石頭中石也出瑱狀如

凝膏在水上擊閭狀如鮐魚大五六尺今海家謂之

本注

二字 王氏補注曰鰻魚石首也出南海頭中有石

集韻劒俗作劒非是南州異物志鰻齒如刀鋸

秋濤曰按漢書言匈奴乃徙蘇武北海上蓋卽鄂羅斯之白哈兒湖非眞海也唐書言骨利幹國處瀚海北其地北距海又北度海則晝長夜短又流鬼國去京師萬五千里濱于北海是北海視西海較近也一統志曰鄂羅斯在喀爾喀楚庫河以北東南至格爾必齊河北岸自大興安嶺之陰以東至海與黑龍江所轄北境接界西接西洋西南至土爾古特國及準噶爾界北至海去中國二萬餘里此則北海之境確

有可攷者也任昉述異記曰海魚千歲爲劍魚臨
異物志曰海內有大魚長十餘丈背負鋸船觸之皆
斷坤輿外紀曰劍魚嘴長丈餘鑄刻如鋸能與把勒
亞魚戰而勝此皆所謂魚兵如劍者也魏武四時食
制曰班魚頭中有石如珠出北海廣志曰班魚頭中
有玉石如珠璣兩航雜錄曰石首魚腦一作白石如
碁子取其石以爲器或飲食遇毒則暴裂腦一作用
其石燒灰吹入鼻中卽愈又下石淋嶺表錄異曰石
頭魚狀如鮓魚隨其大小腦中有二石子如蕎麥瑩
白如玉有好奇者多市魚之小者貯於竹器任其壞
爛卽淘之取其魚腦石子以植酒籌頗脫俗西陽雜

俎云傍海大魚脊上有石此皆所謂魚石也鄭云出
瑱狀如凝膏在水上據形求之當卽後世所稱水母
郭璞江賦云水母曰蝦博物志曰東海有物狀如凝
血縱廣數尺名曰鮓魚無頭目無腹臟所處則眾蝦
附之越人煮食之案鮓與鮓同嶺表錄異曰水母廣
州謂之水母閩謂之鮓癡駕切其形乃渾然凝結一物
有淡紫色者有白色者大如覆帽小者如盃腹下有
物如懸絮俗謂之足而無口眼常有數十蝦寄腹下
啣食其涎浮泛水上捕者或遇之卽歛然而沒乃是
蝦有所見耳南中好食之性煖治河魚之疾集韻云
蠃符非切魚名也出北海水上狀如凝脂一曰水母

也又按擊閭鄭云似鮐魚大五六尺鮐乃河豚之別名以形推之當是江豚一名鱗鯉一名鮡魚一名奔鯨又一名海豚蓋此物本出于海也西陽雜俎云奔鯨非魚非蛟大如船長二三丈項上有孔通頭氣出嚇嚇作聲必大風行者以爲候臨海水土記曰海豨魚豕頭身長九尺按水母以鹽漬之可致遠擊閭殆亦乾而致之故北海之物可入中國也

河魀

鄭氏曰魀當作鼃鼃狀如鼃而大月令季夏命漁人伐魀取鼃登龜取鼃也王氏補注曰集韻鼃或作魀秋濤曰按字書魀卽鼃之別體一切經音義引三蒼

云鼃似鼃而大也字體從鼃從元此鄭氏所本楚辭
云乘白鼃兮逐文魚王逸注大鼃爲鼃魚屬也以其
魚屬故或從魚左傳鄭子公染指鼃羹孟子趙岐注
引作魀羹是漢人多作魀也六書故曰鼃似鼃而脢
長大者幾丈淮南子萬畢術云鼃脂得火可以然鐵
燒鼃致鼃爾雅翼以鼃爲介蟲之元說本續漢書五
行志注

江鰓大龜

鄭氏曰鰓或作鼃鼃狀如蜥蜴長六七尺鰓或爲鱣
鱣鯉也王氏補注曰說文鰓魚名皮可爲鼓禹貢九
江納錫大龜漢食貨志大龜距髯長尺二寸

秋濤曰鰓卽王會篇會稽所貢之鰓也詩大雅靈臺
毛傳曰鼉魚屬說文謂鼉爲鼉魚故古書多從魚作
鰓夏小正二月剥鰓傳云以冒鼓也呂氏春秋云乃
令鰓先爲樂倡鰓乃偃浸以其尾鼓其腹李斯上秦
王書樹靈鰓之鼓史記太史公自序鼃鰓與處鰓字
皆正作魚旁單云或爲鰓者按顏氏家訓曰後漢書
云鸛雀銜三鰓魚多假借爲鰓鮪之鰓俗之學士因
謂之鰓魚按魏武四時食制鰓魚大如五斗匱長一
丈郭璞注爾雅鰓長二三丈安有鸛雀能勝一者況
三頭乎鰓又純灰色無文章也鰓魚長者不過三尺
大者不過三指黃地黑文故都講云蛇鰓卿大夫服

之象也續漢書及搜神記亦說此事皆作鱣字孫卿云魚鼈鱣鱣及韓非說苑皆曰鱣似蛇並作鱣字假鱣字爲鱣字其來久矣據此是鱣鱣二字古相通借故此鱣又作鱣云鱣鯉也與詩毛傳同按爾雅釋魚云鯉鱣鯉鮎鱣魴爾雅舍人孫炎注皆以鯉一名鱣鯉一名鮎鱣一名鮎毛傳及說文皆同其義至陸璣疏言鱣鯉形狀迥殊郭景純注爾雅始分爲六魚詩疏引郭氏音義云先儒及毛詩訓傳皆謂此魚有兩名今此魚種類形狀有殊無緣強合之爲一物是郭不從舊說也陸德明釋文謂目驗毛傳與世不協從郭注自後箋蟲魚者多從郭說鄭康成在郭注未出

以前此註仍用舊說王伯申尙書以舍人及孫注爲是云鯉鱣之鱣自是魚之小者鱣鮪之鱣乃是大魚之名故爾雅之鯉鱣與鰻鱧並稱而不與下文之鮪鮪鮪相通明非鱣鮪之鱣自毛公釋詩之鱣鮪始誤以鱣爲鯉則不知鱣鮪之鱣非鯉鱣之鱣也段氏說文注曰郭注云鱣大魚似鰠而短鼻口在頷下體有邪行甲無鱗肉黃大者長二三丈此卽今江中及關東之黃魚也如其言則鱣絕非鯉矣周頌有鮪有鮪鱣鱣鯉鱣並言似非一物而箋云鱣大魚也然則凡鯉曰鯉大鯉曰鱣猶小鮪曰鮪大鮪曰鮪謂鱣與鯉鮪與鮪不必同形而要各爲類也許意當亦如

是秋濤按以魚之形類攷之自當以郭說爲正從王氏說則爾雅舊說亦不可廢然祇可訓鯉爲鱣不可訓鱣爲鯉毛許鄭皆誤讀爾雅之文也從段氏說則疑鱣卽鯉之類蒙按鯉有鱗鱣無鱗其狀迥殊若鱣可指爲大鯉則鹿亦可稱野馬矣古人著書間不免誤母庸爲之諱也

五湖元唐

秋濤按元當作元說詳後

鄭氏曰五湖揚州浸也今屬吳元唐未聞王氏補注曰國語韋昭注太湖卽五湖

秋濤曰周官職方氏揚州其澤藪曰具區其浸五湖鄭注曰具區五湖在吳南周官義疏曰按張勃陸龜

蒙輩皆謂五湖卽太湖或云以周行五百里故名或云上稟咸池五車之氣或云環湖隨地異稱有菱湖莫湖游湖貢湖胥湖之別若然則經旣言澤藪具區不必更言其浸五湖矣且揚州地域遼闊湖浸繁多何爲舍其可紀者而必複舉具區之一以當二乎是則具區縱有五湖之名而必非職方之五湖也虞翻曰漚湖洮湖射湖貴湖及太湖爲五韋昭曰胥湖蠡湖洮湖漚湖就太湖而五李圖以彭蠡巢湖鑑湖洞庭并太湖而五柯山以射陽湖丹陽湖彭蠡湖青草湖并太湖而五洞庭青草當屬荊州非揚域也大抵楚州之射陽洪州之彭蠡巢縣之巢湖暨洮漚鑑等

皆爲南方之浸或當數其尤大之五者而具區旣列
澤藪則不復數之歟元唐鄭注未詳或謂水經沔水
注有水唐疑卽元唐按水唐戴校改爲水虎與十道
志襄沔記所言水虎合則水唐乃譌字不足爲據以
管見考之元唐當卽魴居郎切魴徒郎切也博雅魴魴
魴也王伯申疏證不解魴魴之義蒙按類篇引博雅
河魴魴也又引魴魴魴也集韻亦引河魴魴也是魴
上當有河字蓋此魚複名一曰河魴一曰魴魴古字
本無偏旁故大傳作亢唐亢元字形相似傳寫譌爲
元唐耳古者蟲魚多以疊韻爲名以是知元唐誤亢
唐不誤也說文以魴爲哆口魚玉篇以爲黃頰魚史

記司馬相如傳鰐鰕鰕魮漢書注載郭璞注云魮鰕也一云黃頰東山經番條之山減水其中多鰕魚注亦云一名黃頰按伯申疏證及郝蘭皋山海經箋疏並謂黃頰又名鰕卽詩小雅鰕魮之鰕陸璣疏以爲黃頰魚者也攷本草綱目魚名黃頰有二一則鰕魚在魚類一則黃頰魚卽黃鰕在無鱗魚類是此二種魚皆名黃頰而一有鱗一無鱗不可溷爲一也攷郭景純但云鰕魚一名黃頰不云卽詩之鰕則二魚本非一物但申引詩鰕魚又引本草之鰕魚爲證恐讀者疑惑故詳辨之本草云鰕生江湖中體似鰕而腹平頭似鰕而口大頰似鮎而色黃鱗似鱗而稍細大

者三四十斤啖魚甚毒池中有此不能畜魚其性獨
行故曰鰓詩云其魚魴鰓是矣此卽魴之形狀所謂
亢唐者也

鉅野菱

鄭氏曰鉅大也鉅

一本奪鉅字

野魯藪今屬山陽菱芡王

氏補注曰鉅野在濟州鉅野縣

秋濤按宋鉅野縣卽漢以來舊治在今山

東曹州府鉅野縣南

一名大野職方克州藪廣志曰鉅野大菱

秋濤按原奪大菱二字今依太平御覽九百七十五卷所引增大於常菱

秋濤曰禹貢徐州大野既豬地理志山陽郡鉅野大
埜澤在北水經濟水注引何承天曰鉅野湖澤廣大
南通洙泗北連清濟舊縣故城正在澤中左傳哀十

四年西狩于大野獲麟卽此海內東經云濟水出共
山南東邱絕鉅野澤注渤海水經云濟水東至乘氏
縣西分爲二其一水南流其一水從縣東流入鉅野
澤元和郡縣志云大野澤在鉅野縣東五里南北三
百里東西百餘里胡氏渭曰此地屢遭河患自漢以
來衝決填淤凡四五度逮元至正四年河又決入鉅
野嘉祥汶上任城等縣皆罹水患及河南徙澤遂涸
爲平陸而畔岸不可復識矣宋史宦者傳云梁山灤
古鉅野澤吳氏澄于氏欽皆云然拙明以灤爲大野
澤之下流非卽大野也爾雅釋草蒹葭周官籩人
加籩之實蒹說文蒹芰也從艸凌聲

三
鉅定羸

鄭氏曰鉅定澤也今屬樂安

秋濤按樂安西漢縣東漢爲國屬千乘郡在今

山東青州府博興縣北

有故縣屬齊

秋濤按西漢鉅定縣故城在今青州府壽光縣西北

八十里東漢無此縣故鄭君言故縣也

羸蝸牛王氏補注曰漢志齊郡

鉅定縣水經注淄水自利縣東北流逕東安平城北

又東逕巨淀縣故城南縣東南則巨澱湖蓋以水受

名也河渠書東海引鉅定國語注羸蚌蛤屬亦作螺

秋濤曰漢書地理志齊郡臨朐下曰石膏山泮水

今本

作泮

水誤所出東北至廣饒入鉅定又廣下曰爲山濁水

所出東北至廣饒入鉅定又云馬車瀆水首受鉅定

說文云泮水

今本作泮水從桂氏馥說改正

出齊臨朐高山東北入

鉅定濁水出齊郡廣今本作厲誤從段注本改奶山東北入鉅定

水經注鉅定皆作巨淀定與淀古今字也今青州府

樂安縣東北四十里有清水泊卽古鉅定澤矣又案

易離爲羸卽今之螺字蚌蛤之屬也爾雅蚶羸蜺蚶蚶

郭璞注云卽蝸牛也是蝸牛名蚶羸說文蝸羸也廣

韻蝸牛小螺也廣雅蠡羸蝸牛蜺蚶也是蝸牛古亦

單言羸也儀禮士冠篇葵菹羸醢鄭注云今文羸爲

蝸內則蝸醢以下二十六物鄭以爲皆人君燕所食

也東山經青要之山是多僕纍蒲盧郭注僕纍蝸牛

也郝氏懿行曰蒲盧聲轉爲僕纍卽蟻螺也郭注西

次三經槐江之山云羸母卽蟻螺是矣又聲轉爲蚶

贏卽蒲盧也吳語云其民必移就蒲贏于東海之濱
是矣是僕纍蒲盧同類之物並生于水澤下溼之地
也秋濤按山海經以僕纍蒲盧並言則非一物也郝
以蒲盧聲轉爲僕纍是合二物爲一誤矣攷廣雅蛙
蜃蒲盧也夏小正十月云雉入于淮爲蜃傳云蜃者
蒲盧也按蜃爲大蛤是蒲盧蛤也非贏也僕纍蒲盧
同類而不同物細爲剖析而古義始明

濟中瞻諸

秋濤按盧本作詹諸詹不从目注同

鄭氏曰瞻諸鼃鼃也

秋濤按盧本作詹諸鼃鼃也

王氏補注曰沆

水出河南府王屋山東流至孟州濟源縣而名濟水
字本作沛淮南子詹諸注蝦蟇

秋濤曰濟四瀆之一字本作沛其从齊之字乃別一

水

說文濟水出常山房子贊皇山東入滹是也

經典相承借濟爲沛而應

劭風俗通遂誤以常山房子之水列入四瀆宜爲酈大使所譏也爾雅鼃醜蟾諸郭璞注云似蝦蟇居陸地淮南謂之去蛟說文鼃字注用爾雅之文曰无鼃詹諸也按瞻諸詹諸蟾諸並聲同字通實一物也玉篇醜字注又作蟾蟾又无醜或轉爲鼓造以轉語求之无與鼓音相近醜在幽部而造字古音亦在幽部二字同聲故淮南說林篇鼓造辟兵文子上德篇鼓造作蟾蜍是也蟾蜍卽此瞻諸也今通作蟾蜍而瞻諸等字罕用矣

孟諸靈龜

鄭氏曰孟諸宋藪也龜俯者靈

秋濤按盧本俯下有首字

周禮天

龜曰靈屬王氏補注曰孟諸在應天府虞城縣

秋濤按唐

宋虞城縣在今河南歸德府虞城縣西南三里

一作盟豬職方青州藪左傳

孟諸之麋

秋濤曰禹貢豫州導荷澤被孟豬史記作明都漢書

作盟諸職方作望諸鄭注望諸明都也爾雅宋有孟

諸始作孟諸二字與大傳及左傳同豬諸都同韻孟

望明盟古聲近也漢書地理志以孟豬在梁國睢陽

縣東北

睢陽故城在今河南歸德府商邱縣南二里

元和郡縣志云孟諸

澤在虞城縣西北十里周迴五十里胡氏渭曰今在

商邱東北接虞城界也郝氏懿行曰睢陽自宋末以來屢遭河決藪澤厓岸不可復識鄭云龜俯者靈爾雅釋魚文也郭璞注爾雅云行頭低周官卜師凡卜辨龜之上下左右陰陽以授命龜者鄭注云下俯者也又周官龜人天龜曰靈屬鄭注云色謂天龜立俯者靈天龜俯是靈龜卽天龜矣

隆谷立玉

秋濤按隆一作隆非

鄭氏曰隆讀如厯降之降或作函谷

秋濤按盧本函作函今河

南穀城西關山也王氏補注曰鄭注立政云三亳者東成皋南轅轅西降谷秦函谷關在陝州靈寶縣西南漢弘農縣淮南子散宜生得立玉百工以獻於紂

秋濤按高誘注云二玉爲一工也
按說文二玉爲珏工珏一聲之轉

秋濤曰書立政三亳阪尹孔疏曰阪地尹長傳言山
阪之地立長爾不知指何處也鄭以三亳阪尹其爲
一事云舊都分爲三其長居險王氏鳴盛曰降谷不
知所在續志河南穀城縣有函谷關志又稱弘農郡
弘農亦有函谷關者以山谷深邃介連兩地故分載
之耳意者穀城之函谷卽降谷降古讀若洪聲轉而
相亂歟秋濤按鄭注大傳明言降谷卽函谷且確指
其在穀城矣西莊偶未照也西山經峯音密山丹水出
焉西流注于稷澤其中多白玉是有玉膏其原沸沸
湯湯黃帝是食是饗是生玄玉郭注曰言玉膏中又

生黑玉也按崧山地在今新疆疑卽產玉之密爾岱山也又于真產玉之川有白玉河綠玉河烏玉河皆在今和闐地烏玉卽玄玉也禮玉藻篇云公侯佩山玄玉文選注引王逸言黑如醕漆玉之符彩也

大都鯁魚魚刀

鄭氏曰大都明都鯁

本注渠成切

魚今江南以爲鮑魚刀

魚兵如刀者也王氏補注曰史記道荷澤被明都索隱音孟豬說文鯁魚名漢書注鯁刀魚也

秋濤曰按史記明都卽禹貢孟豬鄭注職方云望諸明都也大傳前已有孟諸此大都鄭復云明都或疑有誤今按太平御覽九百三十九卷引魏武四時食

制曰望魚側如刀可以刈草出豫章明都澤金澤按

此則鄭注所云明都乃豫章之澤非孟豬之明都也

望魚卽此魚刀矣爾雅謂之鰲鰲刀鰲望一聲之轉

爾雅郭注云今之鰲魚也亦呼爲魴魚南山經茗水

北流注於具區其中多鰲魚郭璞注鰲魚狹薄而長

頭大者尺餘一名刀魚鰲音祚啟反郝氏懿行曰今

海中亦有刀魚登萊間人呼林刀魚蓋林卽鰲聲之

轉矣楊慎異魚圖贊云明都淦澤望魚之沼形側如

刀可以刈草卽本四時食制爲說說文云鰲鰲而不

食刀魚也九江有之秋濤按九江豫章相近此亦大

傳魚刀出大都之一證矣邵氏晉涵曰鰲魚卽今鱣

魚也細鱗白色吻有二鬚腹下有角刺利若刀肉多
細刺人炙食之南方謂之江鱗經廣韻又胡頂切不
言其狀埤雅廣要云魴一名經未知其審

咸會於中國

鄭氏曰言德能及之異物來至也

湯四方獻令

伊尹朝獻商書

不周書錄中以事類來附

秋壽按此周書周史掌之以事類附入商事故議此文也

孔氏晁傳曰言別有此書也王會俱朝貢事故今附
合

湯問伊尹曰諸侯來獻或無牛馬

秋壽按一作馬牛

之所生而

獻遠方之物事實相反不利

孔氏曰非其所有而當遠求其秋濤按一作於民故不利也

今吾欲因其地勢所有獻之易得而必貴其為四方獻

令秋濤按易得而不貴是也一本

孔氏曰制其品物秋濤按一作服之令

伊尹受命秋濤按一本此為四方令曰臣請正東符婁

仇州伊慮漚深九夷十蠻越漚鬻髮文身本注鬻即淺切秋濤按一

本奪髮字

孔氏曰九夷十蠻者秋濤按此句東夷蠻越之別稱

秋濤按孔注蓋當依別本為是孔意以文身以上十

國為東夷故云十者東夷之別稱也與下文六者南

蠻之別稱九者西戎之別稱十二者北狄之別稱文

法正同此本蓋後人所改非孔之舊也惟九夷十蠻

蓋德括之詞似非國名諸國依下所詮釋亦不合十數孔之斯注為不協矣鬻髮文身因

其事以名也王氏補注曰符婁後漢東夷傳有夫餘

國在玄菟北挹婁古肅慎之國仇州伊慮未詳仇州

海中洲漢遼東郡有無慮縣顏氏注即所謂醫無閭

伊慮即醫閭也漚深即歐也王氏自注見上九夷東夷傳夷

有九種曰畎夷干夷方夷黃夷白夷赤夷玄夷風夷

陽夷竹書紀年后芬三年九夷來御孔子欲居九夷

王氏自注爾雅疏九夷一曰玄菟二樂浪三高麗十

四滿飾五鳧更六索家七東屠八倭人九天鄙蠻書武王通道于九夷八蠻職方四夷八蠻蠻類有

八天竺咳首僬僥跂踵穿胸儋耳狗軹旁脊爾雅六

蠻此云十蠻言其非一而已越禹之苗裔封會稽世

本牟姓東越閩君皆其後又交趾之南有越裳國漚
亦甌也鬻髮垂史記越文身斷髮趙世家云翦髮文
身甌越之民也吳世家注常在水中故斷其髮文其
身以象龍子故不見傷害

王氏自注地理志以避蛟龍之害王制東方曰夷被

髮文身通典文身國梁時聞焉在倭東北人體有文如獸額上有三文

秋濤曰按符卽夫餘王會之濊人也疾言曰符徐言
曰夫餘濊卽夫餘二字之合音通典載夫餘國後漢
時始通順帝永和初其王來朝其印文言濊王之印
蓋本濊貊之地其國在長城之北去立菟千里南與
高句麗東與挹婁西與鮮卑接婁卽挹婁王會之稷
慎也盛京通志漢挹婁卽古之肅慎在夫餘東北千

餘里濱大海南與北沃沮接詳前稷慎下仇州浚儀
云海中洲按通典列琉球于東夷仇州與琉球音相
近仇求古字通用疑卽其地今閩東之琉球國也伊
慮卽醫閩楚詞遠遊篇云夕始臨乎於微閩王逸注
東方之玉山也引爾雅醫無閩爲釋醫無閩作於微
閩亦聲之轉也海內南經伯慮國郭注未詳郝氏懿
行曰伊尹四方令正東伊慮疑卽此秋濤按伯伊字
形相近疑其譌也浚儀意以漚深爲一國按漚當卽
溫州之東甌也詳前歐人蟬蛇下深疑卽王會之目
深也詳前目深下論語云子欲居九夷劉氏七經小
傳云九夷蓋在徐州莒魯之間中國之夷非海外之

夷也呂氏大事記云史記李斯曰惠王用張儀之計南取漢中包九夷制鄢郢戰國策張儀曰楚破南陽九夷內沛許鄢陵危以此考之九夷之地略可見方孔子在陳蔡相去蓋不遠也秋濤按九夷十蠻蓋部落眾多本非一地劉原父呂東萊以九夷在徐州南陽之間存以備攷越有百越之稱其類甚多詳前干越東越會稽下或以越溫爲一國按上已有溫則此溫疑卽建甯府之西甌也詳前且甌文屢下云鬻髮者按說文鬻女鬻垂貌也楚詞招魂云盛鬻不同制王逸注鬻鬻也裝飾兩結垂鬻下髮又長髮曼鬻注云曼澤也言美人長髮工結鬻鬻滑澤以是攷之則

鬻髮蓋謂垂髮也通典倭國婦女被髮屈紒卽其類
矣或以鬻爲剪之假借蓋斷髮也引曲禮蚤鬻爲證
其說亦通云文身者南史有文身國在倭國東北七
千餘里卽通典所載也又史言倭國男子皆黥面文
身自言太伯之後又辰韓男女近倭亦文身馬韓南
界近倭亦有文身者史記吳太伯世家云太伯仲雍
二人乃犇荆蠻文身斷髮示不可用是古時吳越甌
閩之地多有此俗也

請令以魚皮之鞞口劍之醬鮫厥利劍爲獻

本注鞞布頂切秋濤

按一本劍上無方空非鮫一作蛟

孔氏曰鞞刀削劍

秋濤按劍上當有鯁字

魚名厥盾也鮫皮作

之鮫文魚也王氏補注曰左傳注鞞佩刀削上飾詩
鞞琫有珌正義鞞今刀鞘說文烏鰂魚名荀子楚人
鮫革爲甲方言盾或謂之戢王氏自注音 伐或作戢後漢志佩
刀乘輿半鮫魚鱗山海經注鮫皮可飾刀劒口本草
注沙魚一名鮫

秋濤曰魚皮卽尙書大傳之魚革也說已見前徐氏
竹書統箋引此作魚支之鞞誤也盧抱經學士云口
疑是烏字王懷祖先生讀書雜志曰案北堂書鈔酒
食部五引作鰂鰂之醬又引注云鰂鰂魚名玉篇鰂
午胡切魚名廣韻作鰂未知其審秋濤按說文鰂鰂魚
也然說文無鰂字段氏以爲俗字改爲烏玉篇則有

鰮字注云鰮鰮魚本作烏是玉篇亦不以鰮爲正字矣按烏鰮本魚名自南越記謂此魚能浮水上卷取烏故名烏賊後人皆從其說然此言特因其名而傳會耳觀四方令有鰮字則鰮字亦有所本未可遽以爲非也吳都賦作烏賊賊或作鰮六書故云形如革囊口在腹下足生口旁兩須如纜又名纜魚腹有墨又名墨魚古人甚重之鰮說文海魚也皮可飾刀中山經荆山漳水其中多鰮魚郭注鰮鮓魚類也皮有珠文而堅尾長三四尺末有毒螫人皮可飾刀劒口錯治材角今臨海郡亦有之初學記引劉欣期交州記曰鰮魚出合浦長三尺背上有甲珠文堅彊可以

飾刀口又可以鑣物郝氏懿行曰長三尺當作三丈
張揖子虛賦注云蛟狀魚蛇尾皮有珠也蛟卽鮫字
古通用海內西經鳳皇鸞鳥皆戴鵝郭注音伐盾也
正南甌鄧桂國損子產里百濮九菌本注里一作重秋
百九十一卷引此甌作歐鄧作
陸損子作指子產里作陸童

孔氏曰六者南蠻之別名秋濤按據王注
則當爲七國王氏補注

曰百濮見左傳鄧曼姓甌卽甌駱山海經桂林八樹
在番禺東秦南取百粵之地爲桂林郡漢曰鬱林餘
未詳後漢注里蠻之別號今呼爲俚人

秋濤曰浚儀以甌爲甌駱蓋指西甌駱也今廣西潯
州府貴縣及越南占城等國皆其地說互詳前路人

下淮南子云楚人地垣之以鄧林高誘注鄧林沔水
上險史記云楚阻之以鄧林集解引山海經夸父棄
其杖化爲鄧林駟謂鄧林後遂爲林名索隱云蓋非
在中國也劉氏以爲今襄州南鳳林山是古鄧祁侯
國故云阻以鄧林也秋濤按海外北經明言夸父飲
于河渭不足北飲大澤未至道渴而死棄其杖化爲
鄧林則鄧林在河渭之北非此正南方之鄧也諸家
注皆誤若此所云則卽古鄧國左傳巴濮楚鄧吾南
土是也浚儀所解得之桂國當卽秦桂林郡漢改曰
鬱林郡治在今廣西潯州府境舊唐書云桂州臨桂
縣州所治故秦時立爲桂林郡一統志曰按秦桂林

郡在鬱林舊唐書以臨桂當之誤也攷今桂林府治
臨桂縣漢置始安縣屬零陵郡吳置始安郡于此梁
置桂州至唐貞觀八年始改爲臨桂縣與秦之桂林
郡迥異不可溷也損子太平御覽引此作指子攷海
外南經云三苗國載國在其東其爲人黃能操弓射
蛇郭注音秩亦音替大荒南經有載民之國帝舜生
無淫降載處是謂巫載民巫載民盼姓食穀不績不
經服也不稼不穡食也爰有歌舞之鳥鸞鳥自歌鳳
鳥自舞郭注言此國自然有布帛五穀今按載字從
至得聲音與指相近當卽商初之指子國也產里太
平御覽引此作陸童或曰陸童蓋陸終之後楚之先

也史記楚世家吳回生陸終陸終生子六人六曰季連牟姓楚其後也史言季連生附沮附沮生穴熊其後中微或在中國或在蠻夷弗能紀其世周文王之時季連之苗裔曰鬻熊成王時而封鬻熊曾孫熊繹於楚疑當商初時季連之裔在蠻夷中卽以陸童爲國號故伊尹列于正南諸國中也秋濤按商頌云維彼荆楚居國南鄉竹書紀年夏癸二十一年商師征荆荆降是夏商時已有荆楚之國其卽爲陸終之後與否未知其審百濮詳前卜人下九菑者大荒南經有小人名曰菑人郭注音如朝菑之菑畢尙書曰此卽大荒東經靖人也按菑與靖古音不同部蓋非一

國疑菌人卽此九菌海內經曰南海之內有衡山有菌山有桂山山名菌桂蓋各以所產物爲名此九菌國其地必產菌蕈故因而命之呂氏春秋云和之美者越駱之菌說文云菌地蕈是也高誘注以菌爲竹筍非是下文以菌爲獻當卽九菌貢其土產矣

請令以珠璣璚象齒犀翠羽菌鶴

秋濤按矩秋濤一作鶴矩按一

注目狗爲獻

孔氏曰璣似珠而小菌

秋濤按菌與鶴非一物此下蓋有奪字

鶴可用

爲旌翳矩狗狗之善者也

秋濤曰璚瑁亦作玳瑁南州異物志云生南方海中大者如蘧蔭背上有鱗大如扇發取其鱗因見其文

欲以作器則煮之因以刀截任意所作本草云似龜
甲有文解毒兼辟邪史記曰趙使人於春申君欲夸
楚爲璚瑁簪漢書西域傳贊云明珠文甲如淳曰文
甲卽璚瑁也爾雅犀似豕郭注形似水牛豬頭大腹
庫腳腳有三蹠黑色三角一在頂上一在額上一在
鼻上鼻上者卽食角也小而不橢好食棘亦有一角
者吳語云奉文犀之渠韋昭注文犀犀角之有文理
者也按犀角成文厥類實繁通天駭雞見珍往籍其
餘不可勝紀也海內經曰有青獸如兔名曰菌狗有
翠鳥有孔鳥按此經上文云南方有贛巨人則此亦
南方物也菌狗疑卽矩狗菌言其小猶大荒經所云

有小人名曰菌人也海內經本作園狗今本上从艸
誤郝氏懿行云園蓋古菌字其上从艸如芬薰字今
皆从艸古从艸作券薰字是其例也伊尹四方令云
菌鶴短狗疑卽此物也按菌鶴矩狗當是三物蘭皋
以爲一非矣

正西昆侖狗國鬼親枳己闌耳貫胸雕題離邱漆齒自注
文選注作離身染齒後漢注胸作匈雕作彫闌徒盡切
一作闌秋濤按一本昆侖作崑崙非是此種古字當存
也之

孔氏曰九者西戎之別名也闌耳貫胸雕題漆齒秋濤
按一本亦因其事以名之王氏補注曰禹貢織皮昆
侖王肅曰昆侖在臨羌西王氏自注今狗國犬戎也

唐天文志聲教所不暨皆係于狗國鬼親鬼方也通
典流鬼在北海之地鬼國在駁馬國西枳己未詳左
傳衛侯入于戎州己氏在楚邱縣秋壽拔楚邱非正
西也疑本西方之
戎後遷于衛地故爾雅疏蠻類有狗軹關耳山海經
亦有己氏之名耳有聶耳離耳國呂氏春秋北懷關耳貫胸山海經其
爲人匈有竅尸子曰貫匈者黃帝之德嘗致之爾雅
疏蠻類有穿胸雕題王制曰南方曰蠻雕題雕刻鏤
也題額也刻其肌以丹青涅之山海經有彫題國通
典百越古謂之雕題離身山海經有三身國一首三
身漆齒山海經有黑齒國齒如漆後漢東夷傳自朱
儒東南至黑齒國唐黑齒常之百濟西部人

秋濤曰禹貢之昆侖國當卽在昆侖山旁言昆侖者
人人殊當以爾雅河出昆侖虛之言爲斷徐氏松漢
書西域傳補注曰西藏東北三百十里有岡底斯里
卽古崑崙釋氏謂之阿耨達其山分四幹向北者曰
僧格喀巴布當和闐正南分爲二支一支東趨爲張
騫傳及此傳所稱南山以在西域之南也一支過和
闐西北趨千六百餘里又西而北折又折而東環千
八百餘里統名蔥嶺蔥嶺又東趨爲天山過回疆北
至巴里坤東北而止是爲西域之北山戴氏震水地
記曰自紫山西連磔石山又南迤西連接恆水所出
山今呼岡底斯者互二千里皆古昆崙之虛也又曰

河源以南唐吐蕃今西藏之境古昆崙國在焉云狗國者攷海內北經犬封國曰犬戎國狀如犬郭注黃帝之後生白犬二頭自相牝牡遂爲此國言狗國也據景純之言則狗國卽犬戎耳經又云環狗其爲人獸首人身郝氏懿行曰伊尹四方令狗國卽此易林云穿胸狗邦淮南墜形訓亦有狗國云鬼親者浚儀以爲鬼方其說近是詳前方人下海內北經有鬼國在貳負之尸北爲物人面而一目魏志東夷傳云女王國北有鬼國唐書云流鬼在北海之北北至夜叉國餘三面皆抵大海鬼國在駁馬國西六十日行其國夜遊晝隱口在頂上按諸家所紀鬼國或在東或

在北皆不在正西非此也浚儀引唐書流鬼鬼國以證鬼方揆之地形斯爲舛矣枳已浚儀云未詳今按枳已疑卽所謂南己之市也墨子云舜西教乎七戎道死葬南己之市後漢書王符傳注引作南巴畢尙書以作巴者爲是舜葬九疑九疑古巴地也王懷祖先生曰按北堂書鈔及初學記禮部下引墨子並作南己後漢書趙咨傳注及太平御覽並引作南紀呂氏春秋安死篇舜葬于紀市卽所謂南紀之市則己非誤字也若是巴字則不得與紀通矣墨子稱舜葬地本不與諸書同不必牽合舜葬九疑之文也按墨所言舜事雖不足信然所稱七戎之地必據戰國時

輿地而言則紀市爲戎灼然可據紀市與枳已聲近
蓋卽一地也高誘注呂覽云九疑山下亦有紀邑當
有所受之矣關耳或疑卽聶耳按海外北經聶耳國
爲人兩手聶其耳郭注言耳長行則聶持之也按孔
氏注云關耳爲飾則與耳長攝持義別說文云闔樓
上戶也當取耳孔洞達爲義今四川省西金川之地
夷人幼時穿耳卽用樺皮卷塞日漸增添後遂可貫
拇指當銜巨環大於跳脫蓋卽關耳之俗矣又海內
北經闔非人面而獸身青色郝蘭皋曰耳非形相近
伊尹四方令正西闔耳疑卽此海外南經有貫胸國
畢注曰淮南子墜形訓有穿胸氏高誘注云穿孔達

背竹書紀年云黃帝軒轅氏五十九年貫胸氏來賓
括地圖云禹平天下會于會稽之野又南經防風之
神弩射之有迅雷二神恐以刃自貫其心禹哀之乃
拔刃療以不死之草皆生是爲貫胸之民博物志云
穿胸民去會稽萬五千里俱見李善文選注按竹書
黃帝時已有貫胸民則括地圖之言未得其實也異
物志曰穿胸之國去其衣則無自然者蓋似效此貫
胸民也秋濤按詳此則穿胸者亦不過雕鏤其胸以
爲飾非眞胸背穿透也沈佺期泛海詩云嘗聞交趾
郡南與貫胸連似貫胸在交趾南矣雕題國亦見海
內南經郭注鯨涅其面畫體爲鱗采卽鮫人也按桂

海虞衡志云黎人女及笄卽黥頰爲細花紋謂之繡面女亦其類也郭云卽鮫人非是海內南經又有離耳國與雕題相屬蓋離邱卽離耳郭注鏤離其耳分令下垂以爲飾卽儋耳也在朱崖海渚中不食五穀但噉蚌及諸莫也秋濤按郭注以儋耳爲離耳蓋以其皆在南也注聶耳不引儋耳者以在海外北經方隅不協故也水經注亦云儋耳卽離耳也可爲互證若離身則諸書無所見蓋身卽耳字之譌後儀引三身證之非也漆齒者亦謂之黑齒管子雕題黑齒注南夷之國南夷志黑齒蠻在永昌關南以漆漆其齒見人以爲飾寢食則去之文選注西屠以草染齒染

白作黑亦其類也按黎人及珠崖皆今瓊州府地黑齒在今永昌府均西南方也故伊尹以爲正西矣請令以丹青白旄紕屬江厯龍角神龜爲獻

孔氏曰江厯珠名龍解角故得也王氏補注曰荀子南海有曾青丹干西海有文旄何承天纂文曰紕氏屬也卑疑反

秋濤曰丹說文云巴蜀之赤石也詳前卜人以丹砂下青者藝文類聚引范子計然曰空青出巴郡白青曾青出弘農豫章白青出新淦青色者善本草經曰空青能化銅鐵鉛錫作金別錄云銅精熏則生空青又云緣青生山之陰穴中色青白是也白旄卽旄牛

尾之白者說詳前珥旄下爾雅云紕飾也玉篇以紕爲冠緣邊飾按雜記下云紕以爵韋鄭注在旁曰紕旣夕記注飾裳在幅曰紕按在幅卽裳之邊側綽卽紕也是衣裳緣邊俱曰紕爾雅又云毳屬也屬者縠之假借說文云縠西胡毳布也書禹貢正義引舍人注爾雅曰毳謂毛屬也胡人積羊毛作衣又孫炎曰毛毳爲屬按紕屬疑是一物蓋屬而緣其邊者也詞林海錯云江歷珠名卽江驪也五侯鯖云江珠卽琥珀千年茯苓所化或云卽江歷也通典云哀牢出光珠博物志曰光珠卽江珠也

正北空同大夏莎車姑他旦略豹胡

秋濤按旦一作代
旦豹一作貌

翟匈奴樓煩月氏蠡犂其龍東胡

一本注代一作戎

孔氏曰十二者北狄之別名也代

秋濤按一作戎

翟在西北

界戎狄之間國名也王氏補注曰空同爾雅北戴斗

極為空桐黃帝西至于空桐

王氏自注山在隴右

史記趙襄子

娶空同氏大夏在西域月氏擊而臣之淮南子空同

大夏楊子大夏之西莎車國治莎車城姑他未詳趙

世家北狄黑姑旦略未詳豹胡北胡也代北狄之別

秦漢代縣

王氏自注今蔚州秋濤按宋蔚州即今直隸宣化府蔚州治

翟與狄同

晉語翟祖又赤翟隗姓匈奴見山海經殷曰獺粥周

曰獺狁樓煩在晉北趙武靈王北破樓煩月氏居敦

煌祁連間與匈奴同俗蠡犂其龍未詳漢匈奴傳有

昆龍新羣國東胡在燕北見山海經燕秦開襲破東
胡秦時東胡彊月氏盛漢鮮卑東胡之支也烏桓本
東胡唐契丹奚本東胡種爾雅疏狄類有五月支穢
貊匈奴單于白屋

秋濤曰史記黃帝本紀正義引括地志空桐山在肅

州福祿縣東南

唐肅州福祿縣在今甘肅高臺縣西北

志又云笄頭山一

名崆峒山在原州平高縣西百里

唐平高縣即今固原州治然此

皆西方與正北無涉錢氏姑爾雅釋地注以今順天
府薊州東北有空桐山然其地甚近似非戴斗之空
同以管見推之空同當在今蒙古地直北斗之下也
大夏已見前莎車即漢書西域傳之莎車國去長安

九千九百里東北至都護理所四千七百里西至疎勒五百里西南至蒲犂七百里。有鐵山出青玉。宣帝時莎車王殺漢使者馮奉世。發諸國兵擊殺之後。漢時莎車強盛。雄于西域。姑他浚儀未詳。考漢書匈奴傳。姑夕王卽與烏禪幕及左地貴人共立呼韓邪單于。發左地兵四五萬人西擊。握衍胸鞬單于至姑。且水北姑且疑卽姑他矣。且略不知所在。或曰當从別本作且。略史記匈奴傳且居漢書作且渠匈奴官號又匈奴有且鞮侯疑因古地名命之也。云豹胡卽北胡者朔漠地多虎豹故以所產物爲國名。代翟王海六十五百五十二引此文代翟並作戎翟王懷祖先

生讀書雜誌曰作戎翟者是也孔注云在西北界戎狄之間國名也則正文之作戎翟甚明若古代翟之國在今宣化府蔚州東則不得言在西北又不得言界戎翟之間矣然則正文注文皆作戎翟作代翟者誤也秋濤按仍當以代翟爲是伊尹四方令明言正北非西北孔注西字恐係字誤蔚州在山戎北翟之間則亦可云界戎翟也浚儀作王海引此文曰戎翟至補注則以代翟爲正注文分代與翟爲二浚儀地理之學最精所見必不誤也匈奴樓煩均已見前月氏卽禺氏詳前禺氏下蠟犁蓋卽新犁蠟新一聲之轉漢書匈奴傳後北服渾窳屈躰丁零隔昆龍新羣

之國師古曰五小國也王先生曰五小國者四隔昆
五新羣龍字蓋涉上龍城而衍史記漢紀皆無龍字
秋濤按據此則熾犂國在匈奴之北也其龍蓋卽龍
城史記嚴安上書曰深入匈奴燔其龍城索隱曰匈
奴城名音龍又匈奴傳龍城索隱曰漢書作龍城亦
作龍字崔浩云西方胡皆事龍神故名大會處爲龍
城後漢書云匈奴俗有三龍祠祭天神秋濤按龍城
諸家不言所在以管見攷之蓋卽東方之龍城也史
記云將軍衛青出上谷至龍城是龍城地南直上谷
其卽慕容氏龍城無疑東胡已見前

請令以橐駝白玉野馬駒駼馱良弓爲獻

王氏補注曰漢西域傳大月氏出一封橐駝唐吐蕃獨峰駝曰馳千里爾雅野馬如馬而小出塞外鮮卑有野馬駛駝駿馬也生七日而超其母後漢東夷傳句驪別種名小水貊出好弓所謂貊弓

秋濤曰按史記匈奴奇畜有橐他索隱云韋昭曰背肉似橐故云橐也包愷音橐他或作駝山海經號山其獸多橐駝郭注有肉鞍善行流沙中日行三百里其負千斤知水泉所在也爾雅釋文橐字又作駝音託又音洛引字林云駝似鹿而大肉鞍初學記引景純圖讚云駝惟奇畜肉鞍是被迅驚流沙顯功絕域潛識泉淵徵乎其智白玉者按大夏莎車皆在西

域月氏舊國亦近祁連西域傳鄯善國多玉通典于闐有水出玉陶弘景本草注曰好玉出藍田外國疏勒于闐諸處皆善潔白如豬膏叩之鳴者是眞也野馬者穆天子傳野馬日走五百里郭注似馬而小也說文云驛騊野馬也按驛騊與駒騊騊並匈奴奇畜見史記說文以駒騊爲北野之良馬爾雅釋文引字林云駒騊一曰野馬也高誘淮南子主術篇注駒騊野馬也是皆以野馬卽駒騊然此篇以野馬駒騊並稱子虛賦云軼野馬而轉駒騊其爲二物甚明也說文云騊騊馬父羸子也廣異志音決蹄騊亦作題太平御覽引尸子云文軒六騊題無四寸之鍵則車

不行是也

湯曰善

王會篇箋釋卷下終

錢塘諸可寶覆勘

元和管禮昌分校